



撰文 梁俊偉 攝影 戴樹資料 李寶瑜 設計 陳子筠



真差家，香港日日跌幾隻鋁窗落街。  
其中重災區葵盛東邨，共有七座裝了鋁窗，本年至今已跌了十四隻鋁窗，全都發生在其中兩座——九八年落成的盛樂樓及盛富樓，絕非巧合。本刊發現，這兩座的鋁窗比其餘五座少了兩口拉釘，而且懷疑拉釘質料和其餘五座有別，因而造成連環墮窗意外！

# 鋁窗亂飛 真相



▲葵盛東邨現時圍欄滿布，恐防鋁窗亂飛傷人。



◀鋁窗飛街無日無之，市民人心惶惶。《蘋果日報》圖片



沈太打開「五花大綁」的窗也極小心翼翼。

**葵** 盛東邨盛樂樓二十九樓的沈太，每天都檢查廳及睡房的鋁窗有否綁好，因為六月初她曾在關窗時跌了一隻鋁窗落街，幸好沒傷人。沈太猶有餘悸地說：「當時梗係驚啦，心都震埋！自從跌窗之後我就綁起晒屋企啲窗！」

房屋署從沒特別公布過這兩座樓是

重災區，也沒向住戶解釋過原因，但做了廿多年屋宇維修的盛富樓互助委員會主席陳先生大力抨擊：「同邨其餘五座的鋁窗都每隻有六口不銹鋼釘，惟獨是這兩座每隻鋁窗只有四口鋁釘。少兩口拉釘會令鋁窗承受力細好多，加上鋁釘氧化機會較高，又怕雨水酸性，所以入伙六、七年就咁多窗跌落嚟！」

## 死撐「符合建築常規」

曾到訪現場的驗樓師詹濟南亦指出，盛樂、盛富樓的鋁窗確是只有四口拉釘，「四口和六口釘的耐用程度梗係差好遠啦！我驗過太古城、杏花邨十幾廿年嘅樓，佢哋用六口釘，啲窗仲好靚。」

本刊就盛樂、盛富樓鋁窗缺兩口拉釘及懷疑使用鋁質拉釘，詢問負責有份興建的中國建築（曾參與機場客運大樓、西九龍填海等工程），但該公司表示不會回應，叫記者問房署。

而房署回覆說，〇〇年前的建築物，是容許每隻鋁窗上、下各使用兩口拉釘，〇〇年後才改例要上、下各三口拉釘，「所以盛樂及盛富樓落成時是符合當時的建築常規。」但就沒有解釋為何只有這兩座的鋁窗跌落街，也沒表示會否追究建築商。



盛富、盛樂樓鋁窗這位置都只有一口拉釘（上圖），而其餘五座則有兩口拉釘；整隻窗少兩口拉釘，導致盛富、盛樂這兩座樓跌窗。

